



SIARAN MEDIA

393 PELATIH TAMAT KURSUS SPAK: SEDIA GALAS AMANAH SEBAGAI “GURU PERTAMA” ANAK BANGSA

PUTRAJAYA, 25 Jun - Seramai 393 pelatih berjaya menamatkan Kursus Pendidikan Awal Kanak-Kanak (SPAK) Siri 1 Tahun 2025 yang berlangsung selama dua bulan di lima Pusat Latihan KEMAS seluruh negara dan menerima sijil tamat kursus dalam satu majlis rasmi hari ini.

Majlis penyampaian sijil telah disempurnakan oleh YB Datuk Hajah Rubiah binti Haji Wang, Timbalan Menteri Kemajuan Desa dan Wilayah, yang menyifatkan pelatih SPAK sebagai tunjang pendidikan awal negara.

“Anda bakal menjadi guru pertama dalam hidup mereka dan dari pangkuan andalah akan lahir anak-anak desa yang suatu hari nanti membina kerjaya sebagai jurutera, doktor, imam, pendidik, pemimpin, serta menjadi penyumbang besar kepada masyarakat dan negara,” tegas beliau.

KEMAS kini mempunyai lebih 10,123 pendidik TABIKA dan hampir 1,865 pendidik TASKA yang bertanggungjawab mendidik lebih 221,000 kanak-kanak di seluruh negara.

Antara pencapaian signifikan KEMAS termasuklah perkembangan pesat Program Pra-Tahfiz TABIKA KEMAS yang kini merangkumi 4,329 kelas, melahirkan lebih 61,000 huffaz cilik di seluruh negara. Inisiatif ini turut diperluas melalui PELiTa@KEMAS, yang menyediakan kesinambungan hafazan sehingga usia 12 tahun.

Dalam usaha memperkasa pendidikan digital, KEMAS juga melaksanakan Smart Classroom@KEMAS, dengan sasaran sekurang-kurangnya satu TABIKA pintar di setiap daerah menjelang tahun 2026.

Selain itu, perhatian turut diberikan kepada kanak-kanak berkeperluan khas melalui penubuhan TABIKA Tunas Istimewa@KEMAS, yang menyasarkan satu TABIKA khas di setiap daerah menjelang 2027, bagi memastikan tiada anak tercicir daripada pendidikan awal yang berkualiti.

YB Datuk Hajah Rubiah turut menyeru para graduan agar kekal komited sebagai pendidik.

“Hari ini anda menamatkan kursus, tetapi jangan pernah tamatkan usaha. Jadilah pendidik yang membina bukan sekadar mengajar, tetapi mengilham dan menghidupkan harapan anak-anak luar bandar.

Teruskan belajar, menyumbang, dan menjadi cahaya buat anak-anak kecil. Jika ingin melihat masa depan negara, lihatlah kepada bagaimana mereka dibentuk hari ini,” tambah beliau.

Jabatan Kemajuan Masyarakat (KEMAS)

Tarikh : 25 Jun 2025
No. Rujukan : KEMAS.100-9/1/3 (21)